

ՎՐԱՍՏԱՆԻ ԱՐՏԳՈՐԾՆԱԽԱՐԱՐՈՒԹՅԱՆ ՏԵՂԵԿԱԳԻՐԸ՝ 1919 Թ. ԶԱՆԳԵԶՈՒՐԻ ՊԱՏԿԱՆԵԼՈՒԹՅԱՆ ՎԵՐԱԲԵՐՅԱԼ*

1918 թ. մայիսին՝ Հայաստանի անկախությունից վերականգնումից հետո, նորաստեղծ Հանրապետության առջև ծառացած առանցքային խնդիրներից մեկը հարևան պետությունների հետ սահմանների որոշման հարցն էր: Հատկապես սուր էր Հայաստանի և Ադրբեջանի միջև եղած հակասությունը, որի հիմնական պատճառը Լեռնային Ղարաբաղի, Ջանգեզուրի և Նախիջևանի պատկանելության վերաբերյալ վեճերն էին: Դրանք այնքան խորն էին, որ 1918–1920 թթ. ընթացքում Հայաստանի Հանրապետությունը և Ադրբեջանական Դեմոկրատական Հանրապետությունը միմյանց սահմանները ճանաչելու մասին որևէ համաձայնագիր կամ պայմանագիր չեն ստորագրել:

Հայ-ադրբեջանական հակամարտության վճռորոշ հանգրվաններից էր 1919 թ. երկրորդ կեսը: Տեղի տալով Անդրկովկասում բրիտանական հրամանատարության հորդորներին և ադրբեջանական վերջնագրերին՝ 1919 թ. օգոստոսի 12–22-ին Շոշ գյուղում տեղի ունեցած Արցախի հայության 7-րդ համագումարը որոշում կայացրեց փոխգիշտմային ճանապարհով համաձայնությունից հալ Ադրբեջանի հետ: Համագումարի կողմից ընտրված պատվիրակությունը օգոստոսի 22-ին Ադրբեջանի կողմից Ղարաբաղի գեներալ-նահանգապետ նշանակված Խոսրով-բեկ Սուլթանովի հետ ժամանակավոր համաձայնագիր ստորագրեց, որի համաձայն՝ Լեռնային Ղարաբաղը ժամանակավորապես (մինչև Փարիզի հաշտության վեհաժողովի կողմից հարցի վերջնական որոշումը) ընդունեց Ադրբեջանի իշխանությունը՝ ապահովվելու էր հայերի իրավունքները, Ղարաբաղի գեներալ-նահանգապետությունը կից ստեղծվելու էր 6 անդամից (3 հայ և 3 մուսուլման) կազմված խորհուրդ, որի մասնակցությամբ ու վերահսկողությամբ էին լուծվելու կարևոր հարցերն ու այլն¹: Սակայն ադրբեջանական կողմը կարճ ժամանակ անց խախտեց պայմանավորվածությունները:

Ոգևորվելով Ղարաբաղը, թեկուզ ժամանակավոր, իրեն ենթարկվելու հանգամանքից՝ Ադրբեջանը գործուն քայլեր ձեռնարկեց գեներալ Զանգեզուրում իր իշխանությունը հաստատելու նպատակով: Շարուր–Նախիջևանում կազմակերպված մուսուլմանական խռովությունների պատճառով սույն տարածաշրջանը ևս փաստացի դուրս էր եկել Երևանի վերահսկողությունից: Այն է՝ մերկացել էր Ջանգեզուրի թիկունքը:

1919 թ. սեպտեմբերի կեսերից Ադրբեջանը սկսեց պատրաստվել Ջանգեզուրի դեմ ռազմական արշավանքի՝ ադրբեջանական բանակի ընդհանուր

* Ներկայացվել է 12. VI. 2023 թ., ընդունվել է տպագրության 19. VI. 2023 թ.:

¹ Нагорный Карабах в 1918–1923 гг.: Сборник документов и материалов, отв. ред. В. А. Микаелян, Ереван, 1992, с. 323–327.

հրամանատար, գեներալ Ալի-Աղա Շիրվինսկու և ինսուրվ-բեկ Սուլթանովի ղեկավարությամբ կենտրոնացնելով կանոնավոր զորամասերն ու քրդական անկանոն ջոկատները: Փոխարենը՝ հայկական կառավարությունը կողմ էր արտահայտվում գոյություն ունեցող խնդիրները բանակցային ճանապարհով լուծելուն: Ասվածի հավաստումն է երկու հանրապետությունների միջև առկա վեճերը լուծելու նպատակով հայ-ադրբեջանական կոնֆերանս հրավիրելու մասին ՀՀ արտաքին գործերի նախարար Ալեքսանդր Խատիսյանի 1919 թ. հոկտեմբերի 7-ի դիմումն իր ադրբեջանցի պաշտոնակից Մամեդ Յուսուֆ Ջաֆարովին, ինչպես նաև իր կառավարության անունից Բաքվում ՀՀ դիվանագիտական ներկայացուցիչ Տիգրան Բեկզադյանի հոկտեմբերի 15-ի դիմումը Ադրբեջանի վարչապետ Նասիբ-բեկ Ուսուբբեկովին²:

Տեական պատրաստությունից և տեղային մարտերից հետո՝ արդեն նոյեմբերի 4-ին, ադրբեջանական զինուժը Շուշիի, Ջաբրայիլի ու Նախիջևանի կողմերից լայնածավալ հարձակում սկսեց Ջանգեզուրի հայկական բնակավայրերի վրա՝ գրավելով Բայանդուր, Խնածախ, Կոռնիձոր, Տեղ և այլ գյուղերը: Նրանց հիմնական նպատակը Գորիսը գրավելն էր: Սակայն ադրբեջանցիների հաջողությունը ժամանակավոր էր. անակնկալ հարձակումից պաշտպանված հայկական զորաջոկատներն Արսեն Շահմազյանի ու Գարեգին Նժդեհի հրամանատարությամբ նոյեմբերի 6-ին հակահարձակման անցան հաջորդ օրերին ադրբեջանական ուժերին ստիպելով մեծ կորուստներով վերադառնալ ելման դիրքեր³:

Հայ-ադրբեջանական հակամարտությունը Ջանգեզուրում լայնածավալ պատերազմի հանգեցնելու հեռանկարն անհանգստություն էր առաջացնում Թիֆլիսում գտնվող բրիտանական ու ամերիկյան առաքելությունների ղեկավարների և Վրաստանի կառավարության մոտ: Նոյեմբերի 4-ին Վրաստանի արտաքին գործերի նախարար Նվգենի Գեգեչկորին իր հայ և ադրբեջանցի պաշտոնակիցներին զգուշացրեց գեներալ Ռուսթում խնդիրները լուծելու անթույլատրելիության մասին, իսկ նոյեմբերի 13-ին բրիտանական ներկայացուցիչ Օլիվեր Ուորդհոպն ու Դաշնակիցների գերագույն հանձնակատարի փոխանորդ, ամերիկացի գնդապետ Ջեյմս Ռեյը երկու երկրների կառավարություններին հրահանգեցին անմիջապես դադարեցնել արյունահեղությունը: Արդեն նոյեմբերի 16-ին Ռեյը ՀՀ վարչապետ Ալ. Խատիսյանին և Ադրբեջանի վարչապետ Ն. Ուսուբբեկովին առաջարկեց Թիֆլիս ժամանել ու նոյեմբերի 20-ին իր հետ հանդիպել: Ռեյի մասնակցությամբ տեղի ունեցած չորսօրյա բանակցություններից հետո՝ նոյեմբերի 23-ին, Խատիսյանը և Ուսուբբեկովը ռազմական գործողություններին վերջ տալու ու նոր ընդհարումների չդիմելու մասին համաձայնագիր ստորագրեցին, որը հիմք հանդիսացավ դեկտեմբերի 14-ին Բաքվում հայ-ադրբեջանական կոնֆերանսի գումարման համար: Կոնֆերանսում Ադրբեջանի պատվիրակությունը ղեկավարում էր նախկին վարչապետ Փաթալի Խան-Խոյսկին, ՀՀ պատվիրակությունը՝ պառլամենտի անդամ Մար-

² Յուս. Վ. Ղուկասյան. Հայաստան-Ադրբեջան հարաբերությունների պատմությունից, Երևան, 2009, էջ 265–266:

³ Ռ. Գ. Հովհաննիսյան. Հայաստանի Հանրապետություն, հ. II, Երևան, 2014, էջ 256–258, Ա. Հ. Սիմոնյան. Ջանգեզուրի գոյապայքարը 1917–1920 թթ., Երևան, 2017, էջ 489–530:

տիրոս Հարությունյանը: Առանց էական արդյունք արձանագրելու՝ դեկտեմբեր 23-ին կոնֆերանսն ընդհատվեց՝ Թիֆլիսում աշխատանքները շարունակելու նպատակով: Սակայն այդպես էլ չվերսկսվեց⁴:

Հրապարակվող փաստաթուղթը Ջանգեզուրում ծավալվող պատերազմական իրադարձությունների ընթացքում Վրաստանի կառավարության, ԱԳ նախարարության, Բաքվում և Երևանում վրացական դիվանագիտական ներկայացուցիչների 1919 թ. հոկտեմբերի 22-ից նոյեմբերի 17-ի գրադրություններն են, որոնք նոյեմբերի 20–23-ին ՀՀ վարչապետ Ալ. Խատիսյանի և Ադրբեջանի վարչապետ Ն. Ուսուբբեկովի հանդիպման նախօրեին Վրաստանի արտաքին գործերի նախարարության ինֆորմացիոն բաժնում ի մի է բերվել: Այն հնարավորություն է տալիս հայ-ադրբեջանական հակամարտությանը ծանոթանալ երրորդ կողմի, այս դեպքում՝ Վրաստանի տեսանկյունից: Հայ-ադրբեջանական հակամարտությունը Ջանգեզուրում լայնածավալ պատերազմի վերածվելու հեռանկարն անհանգստություն էր առաջացնում Թիֆլիսում: Վրաստանի կառավարությունը ելնում էր այն կանխադրությից, որ անդրկովկասյան հանրապետությունների միջև պատերազմական գործողություններն ու շարունակական արյունալի ընդհարումները կարող են բացասաբար ազդել հանրապետությունների միջազգային վարկանիշի վրա, խոչընդոտել նրանց դեյուրե ճանաչմանն ու հանգեցնել անկախության կորստի: Հենց այս հանգամանքով է պայմանավորված Ջանգեզուրում հայ-ադրբեջանական զինված ընդհարման խնդրում վրացական կողմի սկզբունքային խաղաղարար մոտեցումը:

«Ջանգեզուրի շուրջ» խորագիրը կրող հրապարակվող փաստաթուղթը պահվում է Վրաստանի ազգային արխիվի (ՎԱԱ) թիվ 1864 ֆոնդում (Արտաքին գործերի նախարարություն): Այն վրացերենից հայերեն է թարգմանել Ջեննի Թամարյանը՝ հնարավորինս հարազատ մնալով բնագրին: Տեքստում մեր կատարած հավելումները բերվում են ուղղանկյուն փակագծերում ([]):

ՀԱՄՈ ՍՈՒՔԻԱՍՅԱՆ,
ՋԵՆՆԻ ԹԱՄԱՐՅԱՆ

ԶԱՆԳԵԶՈՒՐԻ ՇՈՒՐԶ

Հոկտեմբերի 22-ին Վրաստանի արտաքին գործերի նախարարը⁵ Ադրբեջանի կառավարությունում Վրաստանի դիվանագիտական ներկայացուցիչից⁶

⁴ Ս. Վրացյան. Հայաստանի Հանրապետություն, Երևան, 1993, էջ 353–355, Ա-Դ ո. Հայության երկունքը, Երևան, 2019, էջ 670–671, Ռ. Գ. Հովհաննիսյան. Նշվ. աշխ., էջ 259–264, 273–276:

⁵ Գեգեչկորի Եվգենի (1882–1954) – 1918 թ. նոյեմբերից 1921 թ. փետրվարը՝ Վրաստանի Դեմոկրատական Հանրապետության արտաքին գործերի նախարար: 1919 թ. աշնանը կարևոր դեր է կատարել Ջանգեզուրում հայ-ադրբեջանական հրադադարի հաստատման գործում:

⁶ Ալչիբայա Գրիգոր (1881–1957) – 1919–1920 թթ. եղել է Վրաստանի դիվանագիտական ներկայացուցիչը Ադրբեջանական Դեմոկրատական Հանրապետությունում, իսկ 1920–1921 թթ.՝ Խորհրդային Ադրբեջանում:

ստանում է հետևյալ հեռագիրը. «Կառավարությունը որոշեց Ջանգեզուր ուղարկել յոթ հազար տարբեր ազգություններից բաղկացած զորք՝ [Խ.] Սուլթանովի՝ կարգադրության տակ՝ գեներալ [Ա.] Շիխլինսկու հրամանատարությամբ: [Խ.] Սուլթանովն ունի մինչև հինգ հազար քուրդ և երեք հազար ապստամբ նախիջևանցիներից բաղկացած զորք: Բայագետ-Սուրմայուի շրջանում հայտնվել են նաև օսմանյան ջոկատներ: Ադրբեջանական բանակը հարձակման անցավ [հոկտեմբերի] 19-ին, իսկ մյուսները հարձակվելու են այս օրերին: Ռազմական երթուղին անցնելու է Գյանջա-Թարթար-Աղդամ-Շուշի-Գորիս գծով: Գորիսում կա հայկական երկու գումարտակ՝ չորս թնդանոթներով՝ Փիրումովի գլխավորությամբ: Ադրբեջանական բանակը կարող է նշանակված վայր հասնել տասը օրից: Բախումն անխուսափելի է: Միջոցներ եմ ձեռնարկում հարցը խաղաղ ճանապարհով լուծելու համար:

Խնդրում եմ միջոցներ ձեռք առնել պատերազմը կանխելու համար:

[Գ.] Ալշիբայա»:

Հոկտեմբերի 23-ին Բաքվում Վրաստանի ներկայացուցիչ պարոն [Գ.] Ալշիբայան ստանում է հետևյալ հեռագիրը. «Ադրբեջանի կողմից Ջանգեզուրը գրավելու համար զորք ուղարկելն անխուսափելիորեն կհանգեցնի Ադրբեջանի և Հայաստանի միջև զինված հակամարտության: Նման բախման արդյունքն ուղղակիորեն աղետալի կլինի ողջ Անդրկովկասի համար: Մինչդեռ մեր հարցը բարձրացված է Փարիզի համաժողովի օրակարգում, այստեղ երկու ազգերի բախումը կխաթարի մեր անկախության գործընթացը: Ձեր պարտքն է նախարարի անունից ստանձնել բոլոր միջոցառումները՝ արյունահեղությունը կանխելու համար: [Մ.] Ջաֆարովին՝ փոխանցեք նախարարի տեսակետը և այս հարցի հետ կապված ամեն մի մանրույթ:

Նախարարի տեղակալ՝ [Ն.] Քարցիվաձե»¹⁰:

Հոկտեմբերի 24-ին Երևանում մեր դիվանագիտական ներկայացուցիչ [Գ.] Մախարաձեին¹¹ ուղարկվել է հետևյալ հեռագիրը. «Հոկտեմբերի 22-ին Բաքվից [Գ.] Ալշիբայան հեռագրով մեզ տեղեկացնում է հետևյալը. «Ես ձեզ տեղ-

⁷ Սուլթանով Խոսրով-բեկ (1879–1947) – 1918 թ. մայիս-հունիսին՝ Ադրբեջանական Դեմոկրատական Հանրապետության ռազմական նախարար: 1919 թ. հունվարի 15-ին Ադրբեջանի կողմից նշանակվել է Ղարաբաղի գեներալ-նահանգապետ:

⁸ Շիխլինսկի Ալի-Աղա (1863–1943) – 1918 թ. դեկտեմբերից 1920 թ. ապրիլին Ադրբեջանի ռազմական նախարարի օգնական, ադրբեջանական բանակի հրետանու գեներալ:

⁹ Ջաֆարով Մամեդ Յուսուֆ (1885–1938) – 1918 թ. մայիս-հունիսին եղել է Ադրբեջանական Դեմոկրատական Հանրապետության առևտրի ու արդյունաբերության նախարար, ապա՝ նշանակվել Վրաստանում Ադրբեջանի դիվանագիտական ներկայացուցիչ: 1919 թ. մարտ-դեկտեմբերին եղել է Ադրբեջանի արտաքին գործերի նախարար:

¹⁰ Քարցիվաձե Նիկոլոզ (1884–1937) – 1918 թ. նշանակվել է Ադրբեջանական Դեմոկրատական Հանրապետության Վրաստանի դիվանագիտական ներկայացուցիչ: 1919–1920 թթ. զբաղեցրել է Վրաստանի արտաքին գործերի նախարարի օգնականի (տեղակալ) պաշտոնը:

¹¹ Մախարաձե Գերասիմ (1881–1937) – 1919 թ. հուլիսի 27-ին նշանակվել է ՀՀ-ում Վրաստանի դիվանագիտական ներկայացուցիչ՝ պաշտոնավարելով մինչև 1920 թ. ապրիլը, այնուհետև՝ Խորհրդային Ռուսաստանում Վրաստանի Դեմոկրատական Հանրապետության դիվանագիտական ներկայացուցիչ:

յակ եմ պահում, խնդրում եմ ձեռնարկեք բոլոր նախագիտական միջոցները ռազմական բախումից խուսափելու համար: Մենք հեռագրով հրահանգել ենք [Գ.] Ալշիբայային՝ կիրառել ամեն միջոց և համոզել Ադրբեջանի կառավարութ-
յանը, որ իրենց մտադրության իրականացումն ուղղակիորեն աղետալի կլինի ողջ Անդրկովկասի համար:

Նախարարի տեղակալ [Ն.] Քարցիվաձե»:

Հոկտեմբերի 27-ին Բաքվից [Գ.] Ալշիբայայից, ստացվել է հետևյալ հեռագիրը. «Ձնայած իմ ձեռնարկած բոլոր միջոցառումներին՝ Զանգեզուրի գավա-
ռում ռազմական բախումն անխուսափելի է: Հայերն ամրացել են Տեղում և Գորիսում: Ադրբեջանական բանակը երեք ուղղություններով առաջ է շարժ-
վում հայկական դիրքերը կամարած և շրջափակման մեջ վերցնելու նպատա-
կով: [Ն.] Ուսուբեկովի¹² հետ գրույցի ընթացքում ինձ պարզ դարձավ, որ
Ադրբեջանի կառավարությունը բրիտանացիների հովանավորությամբ որոշել
է ռազմական գործողություններ սկսել»:

Նոյեմբերի 4-ին Վրաստանի արտաքին գործերի նախարարությունը
Ադրբեջանի և Հայաստանի կառավարությունների ներկայացուցիչներին¹³
հետևյալ նոտան է հղում. «Մեր տեղեկություններով երկու հարևան հանրա-
պետությունների՝ Հայաստանի և Ադրբեջանի միջև Զանգեզուրի գավառում
հնարավոր գինված ընդհարման մասին լուրեր են տարածվում: Վիճելի հար-
ցերն այս կերպ լուծելու փորձը կխաթարի Անդրկովկասի ժողովուրդների խա-
ղաղության ու ստեղծագործ աշխատանքի ձգտումը և, անկասկած, կործա-
նարար ազդեցություն կունենա անկախության շեմին գտնվող հանրապե-
տությունների ընդհանուր ճակատագրի վրա, քանի դեռ վերջիններիս անկա-
խությունը չի ստացել միջազգային պաշտոնական ճանաչում ու կապելացների
ևս մեկ օղակ դժբախտ իրադարձությունների շղթային, որից օգտվում են
Անդրկովկասի հանրապետությունների ընդհանուր թշնամիները՝ առաջադեմ
աշխարհի առջև ծաղրելով այս հանրապետությունների կենսունակությունը:
Անդրկովկասյան հանրապետությունների միջև նոր ռազմական բախումը
կդառնա մեր նկատմամբ անվստահության և արդարացի նախատինքի պատր-
վակ նրանց¹⁴ կողմից, ովքեր ներկայումս տիրապետում են ողջ տարածաշրջա-
նի քաղաքական նժարներին և նոր խոչընդոտ կստեղծեն Անդրկովկասի հան-
րապետությունների անկախության հարցի ցանկալի լուծման համար: Ուստի
միայն ընդհանուր և միահամուռ համագործակցության ու ներքին խաղա-
ղության և պետության հզորացման արդյունքում Անդրկովկասի ժողովուրդ-
ները կարող են հաղթահարել բազմաթիվ խոչընդոտներ, ապրել արդարացի
պահանջներով և թշնամիներից խլել իրենց համար գերեզմաններ փորող
զենքը: Մենք կարծում ենք, որ խաղաղ հաշտեցումը միակ ցանկալի և համա-
պատասխան ճանապարհն է անդրկովկասյան բոլոր հանրապետությունների

¹² Ուսուբեկով Նասիբ-բեկ (1881–1920) – 1919 թ. ապրիլից 1920 թ. մարտը եղել է
Ադրբեջանական Դեմոկրատական Հանրապետության վարչապետ և ներքին գործերի
նախարար:

¹³ Այն է՝ Վրաստանում ՀՀ դիվանագիտական ներկայացուցիչ Լևոն Եվանգու-
յանին և Ադրբեջանի դիվանագիտական ներկայացուցչի պարտականությունները
կատարող (տեղակալ) Ֆարիս-բեկ Վեբիլովին:

¹⁴ Այն է՝ Անտանտի ներկայացուցիչների:

չահերի համար, հետևաբար՝ խնդրում ենք տեղեկացնել ձեր ներկայացրած կառավարությունը՝ Հայաստանի և Ադրբեջանի միջև վեճը փոխադարձ համաձայնություններ կամ պարտադիր արբիտրաժով լուծելու մեր առաջարկի մասին»:

Նոյեմբերի 5-ին Վրաստանի արտաքին գործերի նախարարը Փարիզի կոնֆերանսի գերագույն հանձնակատարին, Մեծ Բրիտանիայի գերագույն հանձնակատարին, Ֆրանսիայի և Իտալիայի առաքելությունների ղեկավարներին հղում է հետևյալ նոտան. «Մեր տեղեկություններով Չանգեզուրի գավառում այնպիսի լուրեր են պատվում, որոնք, անշուշտ, վատ հետևանքներ են ունենալու: Կարծում ենք, որ Անդրկովկասի հանրապետությունների միջև առկա բոլոր թյուրիմացություններն ու ապակողմնորոշումը կարող են հարթվել պայմանագրով, և անցանկալի ենք համարում վիճելի հարցերը գեներով լուծելու փորձը: Ուստի մենք փորձել և փորձում ենք համոզել Հայաստանի ու Ադրբեջանի հանրապետությունների կառավարություններին, որպեսզի Չանգեզուրի գավառում իրենց միջև ծագած վեճը խաղաղ ճանապարհով հանգուցալուծեն:

Բայց քանի որ մենք մեծ հույս չունենք, որ մեր միջնորդությունը ցանկալի արդյունք կունենա, հետևաբար պատիվ ունենք խնդրելու ձեզ՝ օգտագործել ձեր ողջ ազդեցությունը, որպեսզի Հայաստանի ու Ադրբեջանի միջև զինված հակամարտություն տեղի չունենա, ամեն գնով խուսափել դրանից և հնարավորության դեպքում Անտանտի այլ ներկայացուցիչների հետ կոդեկտիվ Հայտարարությամբ դիմել նշված հակամարտությունը խաղաղ ճանապարհով լուծելու համար»:

Նոյեմբերի 5-ին Բաքվում Վրաստանի ներկայացուցչից ստացվել է հետևյալ հեռագիրը. «Այսօր՝ նոյեմբերի 5-ին, ադրբեջանական բանակը Չանգեզուրում կհատի Բարկուշատ և Հագարի գետերը: Հայերն ուժեղ ամրացված դիրքեր են զբաղեցնում: Նրանք զորք են հավաքում նաև Ղազախի չրջանում և սպառնում են երկաթգծին՝ ակնկալելով ամերիկյան միջամտությունը: Ադրբեջանի կառավարությունը զորքեր է ուղարկում ճանապարհը պաշտպանելու համար: Ադրբեջանի կառավարության դրոմամբ Շարուր-Նախիջևանի բնակիչները չեն ընդունել ամերիկացի գեներալ-նահանգապետին¹⁵ և պահանջել են գրանցել Օրդուբադի գլխավոր նահանգապետարանում»:

Նոյեմբերի 7-ին արտաքին գործերի նախարարը պարոն [Ջ. Օ.] Ուորդըրպից¹⁶ ստացավ հետևյալ նոտան. «Նորին Գերագանցություն պարոն Եվգենի Գեզեչկորիին:

Նոյեմբերի 8-ին այնտեղից¹⁷ եկել է հետևյալ տեղեկությունը. «Առաջին հարձակումն ավարտվեց գետն անցնելով, սակայն հաջորդ գրոհը հանդիպեց կատաղի դիմադրության, ադրբեջանական բանակը կորցրեց մոտ քսան մարդ: Քրդերը մեծ կորուստներ կրեցին»:

Նորին Գերագանցություն: Նոյեմբերի 5-ի Ձեր № 8282 գրությունն ի պատասխան՝ պատիվ ունեմ տեղեկացնելու, որ այս ընթացքում շատ էի ցանկա-

¹⁵ Դաշնակիցների կողմից Շարուր-Նախիջևանի գեներալ-նահանգապետ էր նշանակվել գնդապետ Էդմունդ Դեյլին: Սակայն տեղական մուսուլմանները հրաժարվել են ճանաչել նրա իշխանությունը:

¹⁶ Ջոն Օլիվեր Ուորդըրպը 1919 թ. հուլիսի 22-ին նշանակվել էր Անդրովկասում Մեծ Բրիտանիայի գլխավոր հանձնակատար:

¹⁷ Այն է Բաքվից:

նույն խաղաղ ճանապարհով կարգավորել այն հարցերը, որոնց մասին գրել էիք ինձ:

Ես կշարունակեմ ապագայում ուղիներ փնտրել և օգտագործել բոլոր միջոցները՝ այս ուղղությամբ ցանկալի արդյունքների հասնելու համար:

Օ. Ուորդլուպ»:

Նոյեմբերի 12-ին Ե. Գեգեչկորին Հայաստանի արտաքին գործերի նախարարից¹⁸ հեռագիր է ստանում հետևյալ բովանդակությամբ. «Պատիվ ունեմ հաստատել Ձեր նոյեմբերի 4-ին № 8248 գրության ստացումը, որն ուղարկվել է մեր հանրապետության Թիֆլիսի ներկայացուցչի անունով: Հայաստանի կառավարությունը քաջ գիտակցում է վիճելի հարցերը զենքի միջոցով լուծելու վտանգավորությունն Անդրկովկասի երիտասարդ հանրապետությունների ապագայի համար: Հայաստանի կառավարությունը մշտապես համարել և այժմ էլ համարում է, որ զինված բախումները սպառնալիք են ողջ Անդրկովկասի ճակատագրի համար: Հայաստանի կառավարությունը, ինչպես նախկինում, այնպես էլ ներկա ժամանակներում եղել և պատրաստ է ապահովելու, որ բոլոր վիճելի հարցերը, հատկապես՝ Զանգեզուրի հարցը, լուծվեն խաղաղ ճանապարհով՝ հաշվի առնելով և ուշադրություն դարձնելով երկու կողմերի շահերին: Հայաստանի կառավարությունը Զանգեզուրի գավառի նկատմամբ ունի պատմական և էթնիկ անձեռնմխելի իրավունքներ: Նա այս իրավունքներն անձեռնմխելի է պահել մինչև համաշխարհային պատերազմի ավարտը՝ օսմանցիների վերջին արշավանքի ժամանակ: Բացի այդ, այս գավառի բնակիչների անսասան կամքը վկայում է, որ Զանգեզուրի բնակիչները նույնպես ցանկանում են այս գավառը միացնել Հայաստանի Հանրապետությանը: Այդուհանդերձ, Հայաստանի կառավարությունը, ելնելով Անդրկովկասի բնդհանուր շահերից և հունվարի 24-ին Խաղաղության կոնֆերանսի նստաշրջանում ընդունված սկզբունքներից, զերծ մնաց Զանգեզուրում նախ բրիտանական բարձրագույն հրամանատարության, ապա Դաշնակիցների գերագույն հրամանատար, գնդապետ [Ու.] Հասկելի¹⁹ կողմից հաստատված կարգը խախտելուց, քանի որ վստահ էր՝ Ադրբեջանի կառավարությունը ևս կիսում է այն կարծիքը, որ Անդրկովկասում խաղաղ միջնորդությամբ է պաշտպանված լինի, ինչն Անդրկովկասի ազգերի խնդիրն է, և, իր հերթին, ձեռք կբաշի Հայաստանի դեմ ուղղված ցանկացած ագրեսիվ գործողություններ կատարելուց: Սակայն Ադրբեջանի նախկին ներկայացուցիչն²⁰ ու նրանց բազմաթիվ գործակալները պարբերաբար անհնազանդություններ են հրահրել և գոմարով աջակցել Շարուրում ու Նախիջևանում բնակվող մահադակների, որպեսզի ապստամբություն կազմակերպեն Հայաստանի կառավարության դեմ,

¹⁸ 1919 թ. հունիսից 1920 թ. ապրիլը ՀՀ արտաքին գործերի նախարարն Ալ. Խատիսյանն էր:

¹⁹ Հասկել Ուիլյամ Նեֆյու (1878–1952) – 1919 թ. հուլիսին նշանակվել է Հայաստանում Դաշնակից պետությունների գերագույն կոմիտար, այնուհետև նրա իրավասությունը տարածվել է ողջ Անդրկովկասի վրա:

²⁰ 1919 թ. հունվարի 29-ին երևանում Ադրբեջանի դիվանագիտական ներկայացուցիչ էր նշանակվել Մամեդ-խան Թեքինսկին: Պաշտոնավարել է մինչև հոկտեմբերի 10-ը: 1919 թ. հոկտեմբերի 11-ից մինչև 1920 թ. ապրիլի 28-ը հանդիսացել է Ադրբեջանի արտաքին գործերի նախարարի օգնական:

ինչը փաստագրված է: Ձանգեզուրի պարագայում ևս Ադրբեջանի կառավարությունն ընտրեց մի ճանապարհ, որը սպառնում է ողջ Անդրկովկասի խաղաղ կյանքին ու ամենևին չի ապացուցում վեճը խաղաղ ճանապարհով լուծելու Ադրբեջանի կառավարության անկեղծ ցանկությունը: Ի պատասխան Հայաստանի կառավարության հարցադրմանը՝ ինչո՞վ է պայմանավորված Ձանգեզուրի՝ ափամերձ²¹ շրջաններում ադրբեջանական զորքերի կենտրոնացումը, Ադրբեջանի կառավարությունը մեզ գուտ ձևական պատասխան տվեց, որը բոլորովին չի համապատասխանում խնդրի էական վիճակին և չի մոտենում մեզ՝ երկու հանրապետություններիս, իսկ վիճելի հարցերի խաղաղ հանգուցալուծման հետ կապված գործընթացը, ըստ Ադրբեջանի կառավարության հայտարարության, պետք է միջոց լինի հարևան հանրապետությունների միջև բարեկամական հարաբերություններ հաստատելու համար:

Գիտակցելով Հայաստանի և ողջ Անդրկովկասի ժողովրդի համար ծանր պատասխանատվությունը՝ Հայաստանի կառավարությունը ստիպված է եղել ևս մեկ անգամ դիմել Ադրբեջանի կառավարությանը՝ հրավիրել Հայաստանի ու Ադրբեջանի ներկայացուցիչների համաժողով՝ վիճելի հարցերը խաղաղ ճանապարհով լուծելու նպատակով: Ադրբեջանի կառավարությունն ընդունել է այս առաջարկը, սակայն, այնուամենայնիվ, չի դադարեցրել զորք ուղարկել Ձանգեզուրի ու Բաշքենդի²² շրջաններ, և հաղորդվում է, որ Ձանգեզուրը զենքով գրավելու ռազմական գործողությունն արդեն սկսվել է: Հայաստանի կառավարությունը կարծում է, որ Ադրբեջանի կառավարությունը չի կարող չհասկանալ ու չգիտակցել ողջ Անդրկովկասի համար նոր արյունահեղության աղետալի հետևանքները, իսկ վերջին պահին էլ իր ձեռքը կվերցնի ռազմական օպերացիան և կկանգնեցնի արդեն սկսված մարտական գործողությունները: Հայաստանի կառավարությունն Ադրբեջան—Հայաստան համաժողովի գումարման վերաբերյալ իր կոչով հստակ ապացուցել է Ադրբեջանի Հանրապետության հետ բարեկամական հարաբերություններ պահպանելու իր անխախտ ցանկությունը, ուստի Հայաստանի կառավարությունը փորձեց բոլոր հնարավոր միջոցները հակամարտության խաղաղ կարգավորման համար, և այս պահին էլ սեփական իրավունքի լիարժեք գիտակցումով ու ապագա արյունահեղության և ողջ Անդրկովկասի համար դրանից բխող աղետալի հետևանքների պատասխանատվությունն ամբողջությամբ կրում է Ադրբեջանի կառավարությունը:

Արտաքին գործերի նախարար՝ [Ա.] Խատիսով»:

Հասկելի տեղակալ [Ջ.] Ռեյն²³ այցելել է արտգործնախարար [Ե.] Գեգեչկորիին և նրան ասել, որ ինքը չատ գոհ է Ձանգեզուրի հարցը խաղաղ ճանապարհով լուծելու վրացական կառավարության ձեռնարկած միջոցառումներից:

Նոյեմբերի 14-ին երևանում Վրաստանի կառավարության ներկայացուցիչը ստացել ենք հետևյալ հեռագիրը. «Այսօր ինձ այցելեց Հայաստանի կա-

²¹ Այն է Արաքսի հովիտը:

²² Հետագայի՝ Արծվաշենը:

²³ Ամերիկացի զննողապետ Ջեյմս Ռեյն Ու. Հասկելի ղեկավարած առաքելության շտաբի ղեկավարն էր և վերջինիս բացակայության ժամանակ փոխարինում էր նրան:

ռավարության նախագահ խնամախոսությամբ և Վրաստանի կառավարությանը խնդրեց ձեռնարկել անհրաժեշտ միջոցներ Զանգեզուրի շուրջ Հայաստանի ու Ադրբեյջանի միջև հակամարտությունը խաղաղ ճանապարհով կարգավորելու համար՝ հակառակ դեպքում, ցավոք, հանգեցնելու է անխմաստ արյունահեղության երկու հարևան ժողովուրդների միջև: Պետք է հաստատակամորեն դիմել, որպեսզի նույնաբերի 20-ին Բաքվում նախատեսված համաժողովն անպայման կայանա: Հայաստանի ներկայացուցիչներն արդեն մեկնել են Բաքու: Զանգեզուրում բախումն արդեն սկսվել է, և եթե այն չդադարեցվի այս երկու երեք օրվա ընթացքում, ապա պատերազմն անխուսափելի է»:

Նույն օրը Բաքվից ստացանք հետևյալ հեռագիրը. «Զանգեզուրի ռազմաճակատում իրավիճակը բարդացել է: Նոր ուժեր են ուղարկվում հրետանու երեք գումարտակ գնդապետ [Կ.] Ջիսիճեի»²⁴ հրամանատարությամբ: Մուկկելիչը մեկնեց ռազմաճակատ: Ամբողջ ջոկատի պետ է նշանակվել ռազմական նախարար Միրխանսկու²⁵ օգնականը: Խնդրում ենք բովանդակության մասին զեկուցել ռազմական նախարարին: № 271»:

Գնդապետ [Կ.] Ջիսիճեին Հայաստանի դեմ գործող բանակային ստորաբաժանման ղեկավար նշանակելու կապակցությամբ նույնաբերի 14-ին Բաքվում Վրաստանի ներկայացուցիչն ուղարկվել է հետևյալ հեռագիրը. «Ամեն միջոց ձեռնարկեք, որ գնդապետ [Կ.] Ջիսիճեին Զանգեզուր չուղարկեն: Առհասարակ, պայմանագրի ուժով Ադրբեյջանն իրավունք չունի մեր սպաներին օգտագործել ներքին ճակատում: Համոզվեք, որ պայմանագիրը չի խախտվում: Ոչ մի վրացի սպա չպետք է մասնակցի Զանգեզուրի գործողությանը:

Նախարարի տեղակալ [Ն.] Քարցիվաձե»:

Նույնաբերի 17-ին Բաքվից ստացանք հետևյալ պատասխանը. «№ 8489-ով ուղարկված հեռագրին մանրամասն պատասխան և բացատրություններ է ուղարկել ռազմական կցորդ [Ա.] Նացվալովը»²⁶ գեներալ [Ա.] Զաքարիաձեի²⁷ անունով: [Ն.] Ուսուբեկովն ինձ ասաց, որ [Կ.] Ջիսիճեին գտնվում է Ադրբեյջանի կառավարության ծառայության մեջ, ուստի պայմանագրի 7-րդ կետը չի կարող վերաբերել նրան: Խնդրում եմ ինձ ուղարկել պայմանագիրը:

Վրաստանի ներկայացուցիչ՝ [Գ.] Ալշիբայա»:

Նույնաբերի 16-ին Բաքվից Վրաստանի ներկայացուցիչը հայտնել է հետևյալը. «Նույնաբերի 14-ին ինձ այցելեց Հայաստանի դիվանագիտական ներկայացուցչի տեղակալ Ատամանովը և խնդրեց ինձ ստանձնել Զանգեզուրի գավառում ռազմական գործողությունների դադարեցման մասին միջնորդությունը՝ արյունահեղությունից խուսափելու համար, որը միտում ունի Զանգեզուրից տարածվել ամբողջ Ղարաբաղում: Նույնաբերի 15-ին ես հանդի-

²⁴ Ջիսիճե Կոնստանտին (1853–1920) – ռուսական բանակի գնդապետ: 1918–1920 թթ. ծառայել է Ադրբեյջանի գինված ուժերում, 1920 թ. մարտին ստացել է գեներալ-մայորի կոչում:

²⁵ Փաստաթղթում այդպես է: 1918 թ. դեկտեմբերից մինչև 1920 թ. ապրիլը Ադրբեյջանի ռազմական նախարարը Սամեդ-բեկ Մեհմանդարովն էր:

²⁶ Նացվալիչվիլի (Նացվալով) Անտոն (ծնվ. 1883 թ.) – 1919–1920 թթ. Բաքվում Վրաստանի ռազմական կցորդ, գնդապետ:

²⁷ Զաքարիաձե Ալեքսանդր (1884–1957) – 1919–1921 թթ. Վրաստանի ռազմական ուժերի գլխավոր շտաբի պետ:

պեցի Ադրբեջանի արտաքին գործերի նախարար [Մ.] Ջաֆարովի և կառավարության նախագահ [Ն.] Ուսուբբեկովի հետ, նրանց խնդրեցի ռազմական գործողությունները դադարեցնել և վիճելի հարցերը տեղափոխել Բաքվում կայանալիք Հայաստան-Ադրբեջան համաժողովին քննարկելու կամ հիշյալ հարցերը լուծել արբիտրաժային ճանապարհով»:

Կառավարության նախագահ [Ն.] Ուսուբբեկովին իր հերթին ինձ խնդրեց տեղեկացնել Հայաստանի կառավարությանը հետևյալի մասին. «Ադրբեջանի կառավարությունը Ձանգեզուրում ռազմական գործողություններ չի իրականացնում: Ձանգեզուրն Ադրբեջանի Հանրապետության անբաժանելի մասն է: Այսպես է դիտարկում Ադրբեջանը, ինչպես նաև Դաշնակիցները՝ ի դեմս բրիտանական հրամանատարության: Նույնիսկ Խաղաղության կոնֆերանսի գերագույն հանձնակատար գնդապետ Հասկելը ճանաչեց Ձանգեզուրի գավառի նկատմամբ մեր լիարժեք իրավունքը: Նախիջևանի հարցով համաձայնագրի՝²⁸ կետերից մեկում նա Հայաստանի կառավարությունից պահանջել է օգնել Ադրբեջանի կառավարությանը՝ Ձանգեզուրի գավառում ապստամբական շարժումը խաղաղ ճանապարհով վերացնելու համար, և, ի վերջո, Ձանգեզուրի գավառի հայ բնակչությանը ենթարկեցնել Ադրբեջանի Հանրապետության կառավարությանը: Ադրբեջանի կառավարությանը հասած վերջին տեղեկությունների համաձայն՝ հայկական կառավարությունը ոչ միայն չի կատարել գնդապետ [Ու.] Հասկելի հանդեպ իր պարտավորությունը, այլև հակառակը՝ իր կանոնավոր զորքերն է ուղարկում Ձանգեզուրի գավառ՝ աջակցելու և ամրապնդելու այդ շարժումը: Այս ամենի հետևանքով Ադրբեջանի կառավարությունը ստիպված եղավ ռազմական ուժ ուղարկել Ղարաբաղի գեներալ-նահանգապետին՝ կարգուկանոնը վերականգնելու և անարխիստ-բոլշևիկյան ավազակախմբերի վրա ազդելու համար: Ադրբեջանի կառավարությունը մտադիր է վերջ դնել Ձանգեզուրում հայ ապստամբների կողմից մահմեդական գյուղերի ավերմանը, և 60 հազար անօթևան մուսուլման փախստականներին վերադարձնել իրենց հայրենիք և վերականգնել կարգուկանոնը: Մեզ համար անհասկանալի է, – ասել է կառավարության ղեկավար [Ն.] Ուսուբբեկովը, – Հայաստանի կառավարության բողոքը Ձանգեզուրի գավառում ռազմական միջոցներ ձեռնարկելու դեմ, մինչդեռ իրենք մինչև օրս զենքով դաժան միջոցներ են ձեռնարկում այն մահմեդականների նկատմամբ, ովքեր չեն ցանկանում ճանաչել իրենց իշխանությունը Սուրմալուում, Երևանի գավառում և Կարսի մարզում: Ի հավելումն կառավարության ղեկավարը և Ադրբեջանի կառավարությունը դեմ չեն հայ-ադրբեջանական համաժողովին, որը նախատեսվում է գումարել այս ամսվա 20-ին, Բաքվում: Կառավարության նախագահն ինձ խնդրեց այս ամենի մասին տեղեկացնել Վրաստանի կառավարությանը:

Ադրբեջանում Վրաստանի դիվանագիտական ներկայացուցիչ՝ [Գ.] Ալշիբայա»:

²⁸ Խոսքը Շարուր-Նախիջևանում ու Դարալագյազում չեզոք գոտի ստեղծելու՝ Ադրբեջանի վարչապետ Ն. Ուսուբբեկովի և Հայաստանի գերագույն կոմիսար Նախակված Ու. Հասկելի միջև 1919 թ. օգոստոսի 29-ին ստորագրված համաձայնագրի մասին է:

Վերջին անգամ նոյեմբերի 17-ին Բաքվից ստացանք հետևյալ հեռագիրը. «Այսօր՝ նոյեմբերի 17-ին, հանդիպեցի արտաքին գործերի նախարար [Մ.] Զաֆարովին և վարչապետ [Ն.] Ուսուբեկովին: Մեր, [Զ. Օ.] Ուորդերոպի ու [Զ.] Ռեյի միջնորդության շնորհիվ նրանք համաձայն են ծայրահեղ պայմաններում դադարեցնել ռազմական գործողությունները Զանգեզուրում: Որպեսզի ռազմական բախումները դադարեցվեն, [Ն.] Ուսուբեկովը, Մամեդ-Հասան Հաջինսկին²⁹ և ես վաղը երեկոյան ժամը 9-ին արագընթաց գնացքով գալիս ենք Թիֆլիս:

[Գ.] Ալշիբայա»:

Նոյեմբերի 19-ին Թիֆլիս են ժամանել Ադրբեջանի կառավարության նախագահ [Ն.] Ուսուբեկովը և Հայաստանի կառավարության ղեկավար [Ա.] Խատիսովը:

Ինֆորմացիոն բաժնի վարիչ՝ (ստորագրություն)

ՎԱԱ, ֆ. 1864, ց. 2, գ. 79, թթ. 1–5 չրջ.: Բնագիր: Մեքենագիր:

²⁹ Ադրբեջանական Դեմոկրատական Հանրապետության արտաքին գործերի առաջին նախարար (1918 թ. մայիս–հոկտեմբեր): 1919 թ. դեկտեմբերի 22-ին նշանակվել է ներքին գործերի նախարար: